

Prijevremeni izbori za načelnike/ gradonačelnike u 9 općina u BiH "pod lupom" posmatrača/ica Koalicije



Za prijevremene izbore načelnika/ gradonačelnika u 9 općina / gradova u BiH koji su održani 17.2., Koalicija "Pod lupom" je angažovala 173 građanska, nestranačka posmatrača/ice. Od toga 143 na redovnim biračkim mjestima, 14 u 7 mobilnih timova, 9 u lokalnim izbornim komisijama te 5 dugoročnih posmatrača/ica prijevremenih izbora. Svojim angžamanom i tokom ovih prijevremenih izbora, Koalicija je nastojala spriječiti moguće zloupotrebe i prevare, osigurati poštovanje Izbornog zakona BiH i izbornih pravila, te zaštititi glasove svih birača/ica.

Ocjena prijevremenih izbora 2019.

Izborni dan na većini biračkih mjesta na prijevremenim izborima za načelnike /gradonačelnike u 9 općina /gradova u BiH 2019. godine protekao je u skladu sa Izbornim zakonom BiH, ali uz manji broj nepravilnosti i evidentirane proceduralne propuste u radu biračkih odbora. Ipak, zabrinjava što se pojedine nepravilnosti kontinuirano ponavljaju na svakim izborima u BiH a bilo kakva ozbiljna reakcija zakonodavca, istražnih organa ili izborne administracije na najvišem nivou

izostaje. Koalicija "Pod lupom" do 21 sat nije zaprimila dojave o incidentima na biračkim mjestima. Zaprimljena su 4 poziva građana/ki od kojih se dio odnosi na slučajeve u kojima su birači/ce pri dolasku na biračko mjesto uočili da se na izvodu iz Centralnog biračkog spiska već nalazi njihov potpis iako nisu prethodno glasali.

Završen Finalni izvještaj o građanskom, nestranačkom posmatranju Općih izbora 2018.

Koalicija „Pod lupom“ je završila izradu Finalnog izvještaja o građanskom, nestranačkom posmatranju Općih izbora 2018. godine. Koalicija je posmatrala predizborni, izborni i postizborni period u BiH putem Glavnog ureda u Sarajevu i 7 regionalnih ureda na terenu.

KOALICIJA "POD LUPOM" NA IZBORNI DAN



63 dugoročna posmatrača/ice su na terenu posmatrala rad i sjednice svih općinskih / gradskih izbornih komisija u BiH, aktivnosti predviđene izbornim kalendarom i poštivanje rokova te izborne nepravilnost. 42 posmatrača/ice su posmatrali izbornu kampanju te 3.442 posmatrača/ica su posmatrali izborni proces na redovnim biračkim mjestima, zatim u 143 lokalne izborne komisije, u 60 mobilnih timova i 80 osoba u Pozivnom centru za obradu podataka. Nalazi posmatrača/ica čine okosnicu izvještavanja Koalicije. Finalni izvještaj će biti predstavljen na Centralnoj konferenciji Koalicije, 24.4.2019. godine u Sarajevu.

Kreiran Kratki izvještaj o uticaju 2018.



Koalicija "Pod lupom" je nakon završenih aktivnosti u 2018. godini kreirala kratki izvještaj o uticaju u formi infografike sa kojim je izvjestila javnost o aktivnostima u prethodnoj godini.

Priprema za Centralnu konferenciju Koalicije "Pod lupom"

Koalicija priprema Centralnu konferenciju koja će biti održana 24.4.2019. godine u Sarajevu u Hotelu "Holiday" pod nazivom: "Budućnost izbora u BiH: Kako dostići međunarodne standarde i spriječiti izborne prevare?". Konferencija će okupiti predstavnike/ce zakonodavnih institucija vlasti na svim nivoima u BiH, predstavnike /ce Centralne izborne komisije BiH i lokalne izborne administracije, predstavnike/ce međunarodne zajednice, te predstavnike/ce akademske zajednice, medija i civilnog društva. Zaključci sa konferencije trebali bi poslužiti zakonodavcima prilikom donošenja izmjena izbornog zakonodavstva u BiH.

Koalicija "Pod lupom" na međunarodnoj posmatračkoj misiji u Ukrajini

Članovi Koalicije "Pod lupom" učestvovali su u međunarodnoj posmatračkoj misiji ENEMO-a (European Network of Election Monitoring Organizations) za posmatranje Predsjedničkih izbora 2019. godine Ukrajini.



Posmatranje sjednica Centralne izborne komisije BiH

Koalicija "Pod lupom" je nastavila posmatrati rad Centralne izborne komisije BiH i u 2019. godini. Podsjećamo da u periodu prije nego što je osnovana Koalicija, sjednicamam CIK-a BiH nisu prisustvovali građanski, nestranački posmatrači/ce.



Za sve dodatne informacije pratite nas putem weba www.podlupom.org, te na društvenim mrežama - FB, Instagram, Twitter. Hvala Vam!